

東瀛識略卷三

無錫丁紹儀杏船纂

學校

臺灣府學康熙二十四年設二十五年題准歲科試各額進童生二十名曰附生乾隆五年以粵民入籍臺地者不乏秀良堪以應試奏准另編新字號合郡通校歲科試各額進童生八名附入府學嗣以文風日盛再蒙廣額今歲科試各額進閩籍童生二十一名粵籍童生九名共三十名臺灣縣學亦康熙二十四年設歲科試原額各進童生十二名內澎湖士子取

東瀛識略

卷三

一

進一二名無定額今歲科試各額進童生十五名內澎湖童生三名亦有於府學額內撥增者鳳山及先名諸羅之嘉義二縣學與府學同設原進童生名數及現進學額均如臺灣縣學之數彰化縣學雍正元年設歲科試各額進童生八名淡水土子初附縣學合考後另設半學分額進取今縣學歲科試進額與鳳嘉二學同淡水廳學嘉慶二十二年始設歲科試各額進童生六名內噶瑪蘭士子分進一名今歲科試各額進童生九名內淡屬編炎字號進六名蘭屬編東字號進三名計一廳四邑俱送府覆考再送學

道考試惟澎湖噶瑪蘭二廳尙未設學應試士子一因海洋閒隔一因距郡寫遠送候府考往返維艱准如粵東南澳廳例由廳逕送學道並免府考至廩膳生與增廣生員原額府學二十名粵籍無縣學各十名淡水學各四名今府學廩增生閩籍各三十名粵籍各八名一年一貢曰歲貢臺鳳嘉彰四縣學廩增生各十五名二年一貢淡水廳學廩增生各六名四年一貢澎湖二廳廩增生卽在臺灣淡水兩學額內尙有恩貢優貢拔貢均如內地考選舉充

各省鄉舉例有定額臺灣於康熙二十六年奏准另編

東瀛識略

卷三

二

臺字號額中舉人一名今改至字號定中三名粵籍編田字號中一名會試則視應試舉人多寡恭請

欽定取中今考臺灣縣有舉人自康熙三十二年王璋始有進士自道光九年黃驥雲始鳳山縣有舉人自康熙二十六年蘇莪始有進士自乾隆三十一年莊文進始嘉義縣有舉人自康熙五十年王錫祺始有進士自乾隆二十二年王克捷始彰化縣有舉人自乾隆九年黃師琬始有進士自道光六年曾維楨始淡水廳有舉人自乾隆三十六年葉期頤始有進士自道光三年鄭用錫始澎湖廳有舉人自嘉慶五年蔡

其英始有進士自道光二十五年蔡廷蘭始噶瑪蘭廳有舉人自道光二十年黃纘緒始進士尙闕潮康熙雍正間臺地無進士卽舉人亦復寥寥今則應廷試者且聯翩相繼海表絃誦媲美中原

聖澤之涵濡宏矣哉

內地各郡邑於府縣學外均設書院聚集生徒讀書其中使之交相策勵克成偉器故雍正間各省會書院咸蒙

恩賜帑金歲取息銀永資諸生膏火蓋以興賢育才足廣學校所不及也臺灣書院始自康熙四十三年知府

東瀛識略

卷三

三

衛台揆創建百餘年來屢有興廢今府城書院二曰崇文曰海東臺灣縣書院一曰引心已廢鳳山縣書院一曰屏山嘉義縣書院一曰玉峰彰化縣書院二曰主靜已廢曰白沙鹿港廳書院一曰文開淡水廳書院二曰明志曰學海澎湖廳書院一曰文石噶瑪蘭書院一曰仰山院有掌教曰山長乾隆三十年以延師訓課而以山長稱之名義未協奉

諭應稱院長然沿襲已久卒未能改主院事者曰監院監院有薪水院長有脩脯諸生有膏火官試列超等者有花紅看院有辛工食米所需經費或紳富捐置田

產支應或官捐廉俸給發臺地書院經費大抵民間捐助者十之七官捐以湊者十之三

順治九年令各鄉置學一區擇通曉文義行誼謹厚者為師量給廩餼養贍康熙初因多冒濫令卽革除至五十二年復令各府州縣多立義學延師教導生童以廣文教自是義學遂徧寰宇應需廩餼半係民間捐備然非官為董率不能成成亦不久往往未數年而鞠為茂草卽基址莫可問矣臺灣縣初設義學二增設一鳳山縣初設義學一增設三嘉義縣初設義學八後析隸彰化縣一彰化縣原設義學一增設四

東瀛識略

卷三

四

淡水廳初設義學四增設二澎湖廳先後設義學十三噶瑪蘭廳未設今各廳縣所設半已頽廢存者十不及五

臺灣義學之外又有社學蓋仿楚粵滇黔等省邊隅州縣設學延師教訓苗蠻猺黎子弟之制就歸化番社設立社學擇熟番子弟之秀穎者入學讀書訓以官音熟習之後令其往教生番子弟果能漸通文理取入僧生再援黔省苗學之例請設學額考試庶幾薰陶濡染漸化其獷野之習法至良意至美也奈廩餼等項取之番租每不敷用理番官又不甚經意視同

具文雖不乏清俊番童有志向上能振興成就之者
蓋寡考臺灣縣原設社學五所鳳山縣原設社學八
所嘉義縣原設社學十一所彰化縣原設社學二十
一所淡水廳原設社學六所今亦如義學存者無幾
澎湖廳無番噶瑪蘭廳係續設均無社學

府廳州縣設有教授學正教諭訓導專司訓迪士
子他無所事責甚鉅也然能恪遵功令月課而季
考者百無一二且隸於學者廩增附生若童生非
所約束矣於是有書院之設或合舉貢或萃生童
年甄旬試甲乙其文以導之其遠鄉僻壤貧不能

從師向不知務學之儒童番童更設義學社學以
教之蓋移風善俗莫要乎學故鄭重其事鼓舞造
就之者詳且備如是行見型仁講讓比戶可封而
猶有不盡然者何耶無他古之教者重德今之教
者重文古之學者貴躬行今之學者貴耳食姑勿
論學官程課卽書院師徒所學習者時藝而已等
而上之詩賦策論再上之經義史議而止能遵雍
正中功令兼解律例者已不概見若夫民生疾苦
地方利病兵農禮樂諸大政何利當興而不可卽
興何弊當革而不可驟革設施以何者爲先當務

以何者爲急如子路之間政顏子之間爲邦又如
范文正爲秀才時卽以天下爲己任今日坐而言
他日將起而行者相與研究於平時無有也又何
暇論及立身制行家庭倫紀之間此教與學之所
以不古若歟臺地書院義學社學無邑無之果欲
實事求是童子入學正句讀解字義外教以應對
進退之節忠信孝友之義使之怡然有會於心趨
向自正能文之士衡其文先視其品立心端厚內
行純摯者爲上器識宏通練達世事者次之議論
明正吐屬清俊者又次之寓古人鄉舉里選之意

於評文設教之中有偏僻卑鄙苛刻爲能者文如
范蔚宗詩如溫八义皆擯斥不遺餘力俾知士之
所重不僅時藝宜工而已亦未有生具至性腹蘊
經綸而文章不能華贍條暢者其要則因風振響
首在擇師尤在地方官之行以實心實力庶不負
國家化民成俗育才待用之本意近年廳縣中籌膏
火勤考校廣設義學增益院舍以博振興文教之
名者亦有之抑末也徒逐其末盍務其本

同治七年噶瑪蘭舉人楊士芳會試獲雋爲蘭廳
有進士始近見新刊淡水廳志列黃驥雲選舉表

中註爲粵籍考太學進士題名碑則係臺灣府臺灣縣人如廳志不誤則臺灣首邑尙無登甲科者比聞淡水廳請設專學禧兒承乏噶瑪蘭亦請鳩資建立

文廟設半學冀以文教移其舊習昔裴行儉有言士必先器識而後文藝嘗擬進一語曰士必先德行而次器識世有器識超卓而於父子兄弟夫婦閒不堪問者期其出而致君澤民難矣然自唐以來憑文取士器識猶可於文詞徵之德行非同閭井者不能審知詢事考言二者並舉勢有格礙難行者况書院課士而欲兼核文行必有反唇相稽譁而起者前論教學之方未免意見過偏迂而不切於事姑存之以誌閱歷淺深辛未秋日又識

習尙

臺民皆徙自閩之漳州泉州粵之潮州嘉應州其起居服食祀祭婚喪悉本土風與內地無甚殊異惟氣性剛強浮而易動緣鄭氏初制寓兵於農暇卽以戰爭角力爲事一呼並集今漸仁摩義幾二百年而好勇鬪狠之習迄未盡除往往睚眦之仇報而後快片言不合輒鬪甚則械鬪更甚則分類或閩與粵分或泉

與漳分分則至親密友白刃相加不相認雖富家巨室亦必出資以助從而遷徙其始也臨以兵戎悍然弗顧逮憤氣稍紓徐以官法繩之則亦弭耳聽命而已然有足取者輕財尙義見有流離窮乏者振之必使得所尤重同鄉同姓設受陵辱傾家拯援身罹法網所不卹頗有朱家郭解風獨於近支昆弟閒閒有坐視顛連漠然勿問更有鬪牆訐訟頻年不已者其故殊不可解

臺地物產豐饒各處貨物駢集士農而外商賈爲盛工值尤昂士之初學文者每月朔望試以起講越日列

甲乙榜之獎賚有差曰小講會以七月七日爲魁星生辰羅陳牲醴祭畢劇飲曰魁星會婦女是夕設香花菜品鴨卵七枚於庭以祀織女曰乞巧會農之租田以耕者曰賸田納粟不納銀有先納無利銀兩立約限年年滿田主還以原銀而別佃他田者曰磧地俗呼穀熟曰冬有早冬晚冬雨熟曰雙冬猶麥熟之言秋也所種米麥外麻豆蔗菁薯苾之屬不一有未熟先糶未收先售者曰賣青商賈先期定價給資及時而取曰買青城市之零鬻貨物者曰店聚貨而分售各店者曰郊來往福州江浙者曰北郊泉州者曰

泉郊廈門者曰廈郊統稱三郊郊者言在郊野兼取
交注意年輪一戶辨郊事者曰鑪主蓋酬神時焚楮
帛於鑪衆推一人主其事猶內地行商有董事司事
值年之類工之嫻手藝者無論操鋸執鉞日須銀二
三錢卽肩擔背負輩計日百錢尙趨趨不前必二三
百文乃應命呼山野人曰草地卽嘲其與麋鹿爲羣
也別有游手無賴遨遊街衢以訛索爲事者曰羅漢
腳及冬衣食不繼輒聚徒黨伺掠行旅地方官必募
派役勇分布巡拏歲以爲常先時有驅之回內地者
曰逐水然不久復至今且驅之不勝其驅無復知有

逐水事矣

臺灣僻在東南隅地氣炎燠陽盛易發男女多暴長年
甫舞勺卽如內地十六七許壯男旬日不近女輒不
能忍故頑童土妓在在有之女年十二三卽有破瓜
者人家生女亦不甚重臺灣縣志言臺人雖貧男不
爲奴女不爲婢乃百年以前事今殊不然每每轉鬻
內地爲人婢妾價亦廉於漳泉諸郡他鄉人之旅食
於臺者積番銀數十圓卽可得妻惟習於嬌惰蠶桑
紡織咸不解大家婦女猶工刺繡田家閒有助耕南
畝者中人之家惟知炊爨澣濯而已澎湖婦女獨苦

終日視潮長落赴海濱拾取蝦蛤蚌螺以供饗餐農
事興則栽植耘鋤悉女任之諺云澎湖女子臺灣牛
極言其勞瘁同也

臺俗華侈相尙其服食異於漳泉者漳泉人畏風恆以
布纏首而喜赤足臺人亦纏首多易以藍黑縐紗長
丈餘環繞五六匝以爲美觀有時著襪不繫帶任其
脫覆足面曰鳳點頭然未晚卽除性不耐也男子短
衣每過膝襟多直下曰蘇裾其實蘇人之衣不爾領
則不論頸之肥瘦多上圓下尖半露其胸曰瓜子領
袴之露於衫外者寬長約尺有半曰龍擺尾傭販輿

東瀛識略

卷三

十

隸衣袴率用紗綢今惟澎湖噶瑪蘭尙多布素女子
喜穿紅夏則黑裏衣之袖甚小衫袖則寬幾二尺裹
足者手釧而外有腳鐲以銀爲之重疊至三四行則
丁當有聲瑯嶠婦女多以銀練纏髮有至十餘條者
男女尤嗜檳榔咀嚼不去口日茹百餘文不惜客至
必以獻不以茶酒爲敬宴客必羅珍錯一筵之費至
十餘金不計旨否以豐滿爲貴除夕前數日取各種
生菜沸水泡甕中待發變而後食之曰隔年菜味殊
惡遇喜慶事以紅麴和米粉或麵範如龜形炊熟相
貽卽以龜稱澎湖則製成紅雞爲祀神之敬殆取龜

鶴齡長意而訛爲雞內地人諱言龜臺人忌市豕
羊肉者吹角爲號其音嗚嗚聽之淒楚每值旣望角
聲彌厲蓋是日市廛競饜酒肉其平時一日三餐頗
儉樸卽蔬菜亦罕登盤惟海腥鹹魚是嗜猶有漳泉
遺風焉

南人尙鬼臺灣尤甚病不信醫而信巫有非僧非道專
事祈禳者曰客師攜一撮米往占曰米卦書符行法
而禱於神鼓角喧天竟夜而罷病卽不愈信之彌篤
凡寺廟神佛生辰合境斂金演戲以慶數人主其事
名曰頭家最重者五月出海七月普度出海者義取

東瀛識略

卷三

十一

逐疫古所謂儼鳩貲造木舟以五彩紙爲瘟王像三
座延道士禮醮二日夜或三日夜醮盡日盛設牲醴
演戲名曰請王旣畢昇瘟王舟中凡百食物器用財
寶無不備鼓吹儀仗送船入水順流以去則喜或泊
於岸則其鄉多厲必更禳之每醮費數百金亦有閒
一二年始舉者福州諸郡亦興出海船與各物皆紙
爲之象形而已卽普度亦弗如臺普度者祭無祀孤
魂僧家所謂盂蘭會也自七月初起至月盡止或一
家數家或一村延僧道誦經施食設牲醴花菓包麵
以祭焚紙帛於衢貧家亦必市杯酒塊肉紙鏹少許

祭而焚之其盛則以鎮道府廳縣衙署爲最大堂供神位結綵張燈羅陳圖畫骨董香花務滿設欄以限觀者兩廊爲僧道醮壇日則晡經夜放焰口燃水燈燈以千百計鑼鼓喧闐送浮水面有置錢於中者漁人得之謂一年順利醮二日或三日將畢庭聯巨案三陳列酒饌下鋪草蓆置阿芙蓉膏及所需鎗斗燈籤之屬謂鬼之所好在此不具不受享別具多棹壘猪魚雞鴨鮮菓餅餌高五六尺積如岡阜爲美照壁前搭臺演劇又有擇童男女之美秀者飾爲故事名曰臺擱數架十餘架無定每架四人舁之先以鼓吹編厯街市及署而止官乃賚以銀牌每年需費番銀千圓少亦數百圓胥斂之署以內其雞魚皆生獻越宿已臭未免暴殄僉曰不但葷腥易敗祭後諸品雖存形質食之均無味云

府志云上元節未字之女偷折人家花枝竹葉爲人詬詈謂異日必得佳婿平民則毀傷他家牆垣或竊豕槽雞欄辱及父母亦謂一年大利此與江浙婦女走三橋京都新嫁娘摸城門釘遼時放偷之風頗相類小琉球志云往時北路番婦能作法詛咒謂之向向者禁制也先試樹木立枯解而復蘇然後用之恐能

向不能解也田園阡陌數尺插一杙以繩環之山猪麋鹿弗敢入人有誤摘其瓜菓啖者脣立腫解之平復如初問之諸番近已無有今聞淡水廳屬尙有能持符咒殺人者以符灰雜烟茗檳榔閒食之罔逃弗覺劫財恣淫一任所爲然皆未見惟娼家遇客至利其貲不利其去潛以妓口嚼餘檳榔汁濡客辮尾客卽畱連不忍他適或數日閒濶妓向所奉土神前焚香紙默誦數語客輒心動趨往言者鑿鑿當非臆造是魘制餘習猶未絕也習之惡者更有博塞衙門兵役皆月有規禮故敢明日張膽爲之夜則門懸巨燈

東瀛識略

卷三

三

數人遮客於途廟戲市集環排數十棹如列肆然工商輩得資較易視之遂輕一擲多金囊空弗顧近來物力漸衰鄉鎮猶然城市稍斂戢矣

臺地物阜民殷人多尙義俗宜醕樸乃有相沿陋習如輕生好鬪信鬼嗜博牢不可破致富者因之而貧貧者因之而不肖顧可因而不易弗思所以轉移之哉然有未易言者設場誘賭例禁綦嚴莠民之甘冒不諱者大抵無田可業無藝能操而又慣作苦捨而他圖計惟爲竊爲匪而已每有良有司禁賭愈力盜風愈熾正少一區處法耳至神

道設教所以警懾兇頑俾知戒懼亦足輔聖教所不及語以宜敬宜遠不宜篤信雖士大夫猶將腹誹况乎愚夫愚婦勢必水旱疾疫胥藉口於鬼神爲厲且禁絕其祈禳崇奉迎賽彼風其閒以謀食者不知凡幾一旦失其故業又將何以處之其視性命如鴻毛輕者往往無業棍徒一二人倡之衆卽從而效之和之遂致如水橫決不復可制使之明乎是非仁讓之理咸有家室妻孥之繫戀而猶以強矯自負不知省悔者未之有也然則轉移其習其知所先務哉今內山未耕之土甚多且各莊

東瀛識略

卷三

古

堡均有頭人鄉長堪責以董率教導凡細民之不務正業者盡納諸畎畝閒不難也更擇曉事而有口才者月給廩餼於寬廣寺宇義社學之無虞風日處一月數次敬將

聖諭廣訓及勸善各書廣譬曲證詳爲解說或叶以五七

言韻句教以謳誦以動其好善惡惡樂生惡死之秉彝俾曉然於尊親之義忠恕之道邪不勝正之理毋得就文敷衍虛應故事有能信從轉述遵行恪守者每講獎以百文數十文有差所需經費或鳩之紳富或取之罰贖置產生息以圖經久或於

聽訟時先詰以曾聽講書能述大意否而後理其
曲直有茫然不知者酌令出錢數千文散給聽信
之衆以示懲勸此卽鹿洲太守論治臺事宜罰種
城竹之法稍變通之似於政體無傷如是而草上
之風有不偃者吾未之信况臺民性慕浮榮得一
職銜例貢必顏其楣如訪有孝子弟弟順孫節婦
及鄉里共推善人者分別請旌給扁准其製爲

欽旌特褒某項銜牌婚喪等事列於頭踏之前其人見官
長免行長跪禮用彰殊寵小民見此無有不爭相
誇羨者此本地方官應爲之事甚易辦也所難者

同僚嗤之上臺迂之官不能有三年淹事甫舉行
代者已至卽著有成效後人且不以爲是盡反前
政者有之是多事不如省事與其役心疲神徒勞
無益曷若循分供職差足自娛吁此臺之循吏所
以不易爲而亦不易觀歟

同學友胡君守齋見余前論鞫然曰君之所以謀
教養者古循吏曷以過抑知非錢莫辦乎鳩之於
民民未必從取之於官官無所出其肯解私囊而
爲此者世有幾人耶自古民有恆產乃可講風俗
官有餘資乃可講吏治雍正中議提耗羨設養廉

錢塘沈文恪

近思

力爭言養廉之數有定州縣之

需無定其力不裕其政必偷道光初議核陋規增

公費濟甯孫寄圃協揆

玉庭

亦力陳不可皆欲爲

州縣畱餘地俾得展其手足者非爲官也正爲國
計民生所繫在官設因窘乏因循貽患卽費百萬
金錢而不足黜之誅之已無及矣彼識卑見淺以
刻薄搜括爲能者固不解此亦有通達治體之君
子非不知損上益下爲久安長治計又不能獨行
已志此無可如何事也今官莊歸公矣雜款奉提
矣陋規禁革矣所入之數人盡知之方謂尙有盈

東瀛識略

卷三

六

餘所出之不能上陳不克自限者正難枚舉不致
捉襟露肘之區十無二三如以罰贖充公必蹈科
斂之咎自謀且不暇何暇謀教養君何未之思耶
君所云難尙未甚難君所云易則誠不易君必不
久於幕府會當有日請君入甕余無以答強應之
曰古人曾言廉吏不可爲今之循吏且不易爲余
固言之矣相與一笑而罷守齋懷才未遇不久歿
於臺今墓木拱矣追筆於此用誌黃墟之感辛未

九月又識

姻姪鍾啟元校字